


# REVISTA SITUASAUN: Janeiru 2012

## ASSUNTU NE'EBE PRESIJA ATENSAUN IHA FULAN IDA NE'E:

- Violensia relasionadu ho Juventude
- Konfliktu grupu relasionadu ho Alkohol
- Preokupasaun insidente entre TNI Indonesia ho Komunitade Timor Leste (Oecusse)
- Konfliktu liga ba Identidade Relijiaun

### ASUNTU NE'EBÉ PRESIZA ATENSAUN

#### Total Insidentes ne'ebé relata



Analiza dados husi subdistritu 42, hatudu katak dinamika konfliktu nafatin akontese, no laiha mudansa signifkante husi fulan ba fulan.

### ASUNTU NE'EBÉ PRISIZA ATENSAUN

#### Violénsia relata ho Joven

**Insidente ne'ebé involve joven (14):** Insidente violénsia ne'ebé involve juventude nafatin sai preokupasaun seriu seguransa nian, maski iha redusaun ba insidente iha Dezembru 2011 (25) Janeiru tun ba 14. Insidente rua mane hanesan autór no fetu nu'udar vitima ne'ebé akontese iha 6 de Janeiru 2012, iha aldeia Maununu, suku Ainaro, subdistritu Ainaro Vila, no mós iha dia 1 de Janeiru 2012, iha aldeia Lebutu, suku Hautoho, subdistritu Remexio. Insidente rua ne'e akontese iha festa laran relasiona ho dansa. Insidente (12) autór no vitima mane hotu, ne'ebé akontese iha Manufahi iha insidente (3), Bobonaro (1) Viqueque (4), Dili (4), no Ainaro (2). Maoria insidentes mosu iha dalan (fatin públiku). Motivuu ba insidentes sira ne'e refleta liubá problema pesoal ne'ebé estimula hamosu konfliktu, hafoin hadaet to involvmentu grupu, entre aldeia iha insidente ida. Husi insidente 14 ema na'in (4) hetan kanek. Resposta ba insidente ne'e, ativamente PNTL hatan ba kazu (9), Lider lokal (3), membru familia (1), no ida responde rasik husi parte ne'ebé halo konfliktu.

#### Insidente Relasionadu ho Bebidas Alkohol

Bain-bain ema hemu tua manas bele mós kontribui ba halokon stres no deskansa di'ak. Maibé tua mós dalabarak kontribui ba violénsia, hanesan akontese iha subdistritu Covalima (1), Dili (1), Viqueque (2), Aileu (2), Ainaro (1), Manufahi (2), Liquiça (3) Bobonaro (1).

#### Arte Marsiais

**Insidente ne'ebé involve Arte Marsiais (2):** Involvementu grupu arte marsiais iha konfliktu kompara ho fulan Outubru-Dezembru 2011 (4-3-6-2), konekta numeru violénsia aas, maibé iha janeiru insidente redus to2 (rua) de'it. Iha dia 7-8 de Janeiru 2012, iha aldeia Mate La Hotu, suku Comoro, Subdistriu Don Aleixo, tuda malu entre grupu rua iha tempu kalan. Subdistritu Maliana, Iha dia 1 de Janeiru 2012. Insidentes rua ne'e Polísia kontinua halo hela prosesu investigasaun.

Redusaun numeru insidentes ne'e, hatudu sinal pozitivu husi desizaun Konsellu Ministru hodi fó suspensaun ba grupu arte marsiais ne'ebé halo problema iha fulan hirak liubá. Komunitade balun mak konfortavel ho mudansa ba desizaun ida ne'e ho bele hakmatek iha situasaun kalan, liuliu bairo refere. Maibé, rezultadu monitorizasaun Belun katak, iha suku Holsa subdistritu Maliana no suku Balibo Vila (Bobonaro), sei iha preokupasaun nafatin iha komunitade, tanba iha grupu arte marsiais balun halo pratika atividade iha tempu kalan. Ne'e hatudu katak Polísia seidauk ho maximu ba patrullamentu iha tempu kalan no latau seguransa ba fatin ne'ebé identifika insidente violénsia ne'ebé sempre akontese.



### ASUNTU NE'EBÉ PRESIZA ATENSAUN

#### Insidente entre TNI ho Mane ida iha Oecusse

Insidente (2) ne'ebé akonsete iha fronteira Oecusse. Dahuluk, iha dia 1 de Janeiro 2012 iha fronteira kampaun TNI-BRIMOB, aldeia Usapikolen, suku Bobometo, subdistritu Oesilo, mane ida husi aldeia Usapikolen (Oecusse), insulta TNI-BRIMOB (Indonézia) ne'ebé halo seguransa, tanba la fó autorizasaun atu hasoru malu ho familia iha fronteira Indonézia, maski iha dokumentus legal, ho razaun dia 1 de Janeiro loron feriadu. Nune'e mós portaun Fronteira husi Indonézia taka hela. Kontrariu ho portaun fronteira husi Timor-Leste ne'ebé loka hela, no laiha elemetus ruma ne'ebé halo seguransa, hodi fó informasaun katak iha dia 1 Janeiro hanesan loron feriadu. Insidente daruak kontinuasaun husi indente dahuluk, mane ne'ebé TNI la fó autorizasaun, kontinua tuda portaun kampaun TNI nian. Rezultadu husi asaun kontra ne'e, membru TNI na'in ida ho BRIMOB na'in 1, baku no tesi tiha mane ne'e nian fuuk. Insidente ne'e, membru balu husi TNI, BRIMOB (Indonézia) ho UPF halo atuasau ba insidente ne'e. Maibé mane ne'ebé hetan baku hili dalan hases'an. Kronolojia insidente hatudu ba futuro bele nafatain mosu insidente bainhira laiha seguransa maximu iha fronteira hodi fó informasaun ba ema ne'ebé ba mai Timor-Leste no Indonézia.

#### Insidente Relasionadu ho Membru Familia

Violénsia entre membru familia nafatin hanesan dinámika ne'ebé nafatin akontese. Iha subdistritu Lautem (1), Viqueque (2), Ermera (2), Manufahi (1), Liquiça (1). Polísia resposta ba kazu (2), Lider comunidade (1), membru familia (1), no kazu (1) ida rezistu iha Tribunal Baucau. Feto ida sai hanesan vitima ba kazu iha Viqueque.

### TENDÉNSIA KONFLITU

#### Konflitu Liga ho Identidade Relijiaun

Konflitu tanba identidade relijiaun, akontese fali iha dia 7 de Janeiro 2011, iha aldeia Raiulun, suku Leohitu, subdistritu Balibo. Insidente hahú bainhira mestri na'in rua hasoru malu iha bazar no hase malu, no Mestri ida goza ida seluk tanba nia mak foin muda ba relijiaun. Hafoin goza nia hahú baku ba nia kabun. Depois no kontinua baku malu entre ema na'in rua hafoin hadaet to'o involvmentu grupu rua iha insidente ida. Polísia halo ona prosesu investigasaun ba sira ne'ebé involve iha konflitu. To'o agora iha subdistritu balun, bazeia ba konflitu ne'ebé akontese iha 2011, grupu relijiaun balun labele la'o sira-nia atividades hanesan uluk. Iha Oecusse, subdistritu Pante Makassar, suku Costa, to'o agora grupu Cristaun Vizaun labele hala'o atividade relijiaun hotu, tanba fatin (Igreja) sei taka nafatin. Iha Ainaro Vila, suku Ainaro, Cristaun Vizaun la bele hala'o misa. Iha subdistritu Same Vila, Igreja Adventista sei taka nafatin, misa la bele la'o. Iha Baucau Vila, Grupu relijiaun hotu bele la'o ninia atividade hanesan misa maibé atividades evangelismu hanesan atividades tama sai uma minimiza barak. Preokupasaun kona-ba asuntu ne'e, Ministra da Justiça, nune'e mós Prezidente Komisaun A-Parlamentu Nasionál, iha semináriu ne'ebé realiza husi Ministériu Justiça no NGO Belun, iha dia 27 de Juñu 2011, iha sentru formasaun juridico, Caicoli Dili, afirma katak presiza duni lei ida atu regula atividade relijiaun. No sei tau prioriedade iha debate komisaun A, haree kona-ba lei ne'ebé atu regula atividade relijiaun, maibé komitmentu ne'e to'o agora seidak realiza to'o fin.



#### Involvmentu PNTL iha konflitu

Konsisténsia involvmentu autór husi seitor seguransa iha insidente violentu mantein hanesan kauza preokupasaun iha comunidade. Insidente bainhira mane ida ho motor to'o iha Lampu Merah Kolmera, membru task force ida baku joven ne'e iha motor leten to'o monu ba rai. Impaktu husi insidente mane ne'e nia inus rahun. Kazu ne'e sei iha prosesu investigasaun PNTL. Loos duni kna'ar polísia atu mantein lei no orden, maibé presiza tuir dalan legal, la'ós ho violénsia.

#### Insidente liga ho pagamentu ba veterans no idozus.

Insidente rua liga ho pagamentu Veteranus durante fulan ida ne'e. Iha subdistritu Ainaro Vila familia sira laiha konkordansia ba malu oinsá atu uza osan ne'ebé fó ba familia Veteranu Martir Matebian sira. Iha Oecusse Suku Costa, Subdistritu Pante Makasar, mosu protesta entre membru veteranus ho veteranus responsavel, to'o ameasa malu ho fiziku no lia fuan, tanba membru veteranu ne'e la aseita pontu balun iha rezultadu verifikasaun. Laiha resposta ba kazu rua ne'e. Preokupasaun ne'e liga ba prosesu pagamentu veteranus no idozus. Belun halo ona peskiza hodi hatene kona-ba kauza konflitu no tempu badak sei fó sai relatoriu politika.

#### Disputa Rai

Disputa rai akontese fulan ida ne'e iha distritu Ermera (1), Manufahi (3), Aileu (1), no Dili (1). Insidente iha Dili rezulta ema ida hetan kanek. Insidente ne'e hahú husi na'in ba rai halo moru taka tiha dalan ba comunidade ne'ebé hela iha kotuk labele la'o ba mai. Insidente ne'e kontinuasaun husi insidente dahuluk. Komunitade halo rekomendasau ba Dirasaun Nasionál Terras e Propriedade no Infraestrutura, atu fasilita dalan públiku ba comunidade bele asesu. Maibé laiha resposta pozitivu, no kontinua mosu violénsia.

### ASUNTU NE'EBÉ PRESIZA ATENSAUN

#### Dezastre Naturais:

Dezastre naturais continua afeita comunidade ruma hanesan mós siklu tempu udan nian iha Timor-Leste iha distritu Covalima, Ermera, Ainaro, Oecusse, Aileu., Komunitade iha rural sofre ba impaktu husi udan ne'ebé boot halo mota estraga hotu aihan iha natar no to'os. Maski iha distribuisaun foos ho presu \$12 husi Ministériu Turismu Komersiu Industria (MTCI), distribuisaun to'o de'it iha distritu. Komunitade rurais nafatin seidak iha asesu ba foos MTCI ho folin ne'e, tanba ema iha distritu hola hotu kedas, hafoin continua fa'an fali ho presu ne'ebé \$15-\$16. Familia sira menus aihan, no laiha rendementu husi rezultadu agrikultura, halo sira labele sosa foos seluk ne'ebé continua sa'e ho presu \$19-20. Risku seluk mós eziste husi tempu udan boot no mota sa'e. Dia 16 de Janeiro 2012, iha aldeia Mota Ulun, suku Lahane osidental, subdistritu Vera Cruz, mota lori labarik ida idade tinan 8 hamutuk ho nia inan, bainhira hakur mota atu fila ba uma.

Risku ba ema husi dezastre naturais la'ós tanba de'it mudansa klimátika, maibé hahalok ema nian mós. Ezemplu taa ai arbiru, parte seluk mós tanba kompañia balu halo estrada, ponte la ho kualidade di'ak entaun afeita ba estrada aat no ponte kotu, por ezemplu iha subdistritu Hatudu (Manufahi) kuaze fulan tolu kareta públiku hanesan anguna paradu hotu tanba ponte kotu.

#### Krime Seluk:

Iha 29 de Janeiro 2012, iha aldeia Mota Ulun, subdistritu Cristu Rei, mane ida halo violénsia fíziku ba kondutor ida no baku rahun kareta. Iha dia 11 de Janeiro 2012, Iha aldeia Hudi laran suku Aisirimou, subdistritu Aileu Vila, akontese ema deskonhesidu tuda joven na'in 4 ne'ebé la'ó hela iha estrada area levandaria nian hodi rezulta joven na'in 1 kanek. Polísia halo resposta ba kazu ne'e. Iha dia 6 Janeiro 12, iha subdistritu Viqueque Vila, baku malu entre

mane rua to'o na'in ida hetan kanek, tanba lia fuan buan. Kazu ne'e rezistu ona iha Tribunal Baucau.

### RESPONDE BA KONFLITU

#### Prevensaun ba konflitu iha comunidade



Belun fó apoiu ba Redi Prevensaun no Responde ba Konflitu (RPRK) subdistritu Alas, Same Vila, kona-ba prosesu eleisaun no mós oinsá atu prevene konflitu liu husi apresentasaun materia husi orador ida-idak. RPRK subdistritu Viqueque, realiza semináriu hodi prevene konflitu iha eleisaun. RPRK subdistritu Vemasse realiza semináriu hodi halo refleksaun hamutuk ho grupu arte marsiais. No mós RPRK subdistritu Vera Cruz, realiza seremonia "Hamanas Ai to'os ba Lei Tara Bandu" ne'ebé apoiu husi Belun no Ministériu Solidariedade Sosial (MSS) Departementu Harii Paz no Koezaun Sosial, iha fulan Janeiro 2012.

#### Eventu Nasionál Harii Dame

Komisaun Justiça e Paz Dioseze Dili, (liu husi programa "Laletek", ne'ebé parseiru ho CRS no fundus husi USAID), halo aprosimsaun ho lider arte marsiais sira. No mós hala'o atividade koa'lia direta familia ida-idak nia uma hodi rona oinsá preukupasaun inan-aman nian ba oan sira. Iha parte seluk mós, Belun, liuhusi programa 'Mediasaun Rezolusaun Disputa', fasilita mediasaun disputa rai 4 rezolvidu.

Komisaun Nasionál ba UNESCO realiza semináriu iha salaun auditorium UNTL, Liceu-Dili iha dia 27 de Janeiro 2012 kona-ba peskiza oin-oin ne'ebé bele influénsia dezeña projetu pilotu liga ba política Governu hodi implementa lian materna iha eskola siklu primeiru Topiku ne'e provoka debate barak iha nivel Nasionál no sosiedade sivil. Iha dia 8 Fevereiro 2012, Premeriu Ministru rasik, reafirma ba Parlaamentu Nasionál katak atu uza lian materna ne'e mak ba klase 1°- 4° atu ajuda labarik ba alfabetismu no edukasaun ba primeriu siklu.

### KONA-BA REVISTA SITUASAUN NE'E

Programa AtReS hetan fundus husi União Europeia liuhusi Instrumentu ba Estabilidade, Governu Irlandia liu husi Unidade Resolusaun Konflitus no GIZ liu husi Ministériu Juventude e Esportu. Opiniaun no kontiudus iha dokumentu ida ne'e mak responsabilidade uniku ba NGO Belun no CICR no la iha circunstansia ne'ebé opiniaun hirak ne'e refleita pozisaun União Europeia, Governu Irlandia, ka GIZ. Revisaun situasaun ne'e relata kona-ba asuntu xave relasiona ho insidente violénsia no tendénsia husi koleksaun data emerjénsia liu husi sistema Early Warning, Early Response (EWER)-Timor-Leste. Belun esforsu atu fahé informasaun ne'ebé up-to-date no serteza. Hanoin katak situasaun bele hetan mudansa ho lalais, ami agradece no simu informasaun seluk ne'ebé bele klarifika ka update data ne'ebé ami iha liu husi EWER. Favor email EWER nia Program Manager Bylah Da Costa: [bylah.belun@gmail.com](mailto:bylah.belun@gmail.com). Imajen © Jennifer Hill, Belun